

閩中金石志

國中金石志卷十二

嘉興馮登府輯

吳興劉承幹校

宋無年月可攷以地分系

祈雨道場鄭公顯碑記

秋成在望霖雨未霽遍伸奠瘞之文未協滂沱之應  
昔聞禱雨遺跡猶存比乎唐令踵行甘霖立沛仍借  
營屬用和神民步行而去戴雨而歸遂使大有興歌  
豐年誌慶洵山靈之蘇兆慶爰勒石以紀千秋

按在同安公顯字隱之龍溪人乾道進士調建州  
司戶改知同安見郝志案乾道四年六月建州旱

銅魚金車石刻

銅魚亭在同安南門外溪許雙溪匯處有銅魚金車  
二石雄鎮水中朱子爲之題字刻石後金車如故銅  
魚沒沙泥中後復出以卜盛衰見同安縣志

瞻亭

在同安輪山北龍門下有大石朱子書瞻亭二字  
似道過此欲描取其字是夜石卽倒翻後人刻其旁  
曰墜星石見同安縣志

按閩書言石陷二字倒掛當得其實

龍松

在同安翰山梵天寺東舊有二松攬拏勢若龍戰朱子刻戰龍松三字於石見同安縣志

壘源

在同安蓮花山泉隨汐盈虛朱子鐫字其上

中流砥柱

在同安縣治銅魚亭朱子書

大同

在同安同山上朱子書

馬老 迎仙

在同安金榜山上朱子書

梵天寺石刻

在同安縣大輪山嶺峯嵐四望海色蒼冥朱熹書極目二字

御踏石

在同安龍窟村之上有巨石三片連接水中宋幼主自此登舟往莊坂尾由五道嶺過海入粵後人鐫其石曰御踏石見同安縣志

棋局石

在同安小巒石虎砦仙人井有天然方石周二尺許鐫爲碁局中分一道鐫萬幾分子路一局笑顏同十

字已遭琢沒惟萬幾分同四字尙完善可摹蓋宋邱  
鈞機手筆也踰局稍西鈞石在焉見同安縣志

官榮石

在同安塔期社里有大石壁立勒官榮二字筆勢蒼  
老可二尺餘相傳爲宋陸秀夫書

按君實嘗從二主走温州益王立於福州進端明  
殿學士衛王立以君實爲左丞相後殉崖山之難  
見宋史

談元石

在同安金榜山朱子書

浴龍橋

在同安夕陽山山澗有橋鐫浴龍橋三字相傳宋甯宗浴此

同山

在同安縣梅山寺石上鐫同山二字朱文公筆也

太華巖

朱子書在同安蓮花山

應城山

在同安朱子築隄山上刻應城山三字

溪山第一

在龍溪雲洞石壁上宋朱子書溪山第一四字

按長樂亦有此四字殆後人摹勒猶天風海濤之  
屢見也

石室清隱

在龍溪洞中刻此四字朱子正書

駐蹕處

在漳州太姥山相傳宋少帝駐蹕於此布衣張士楷  
詩云景炎遺跡杳關駐蹕猶傳太姥山又壽山寺  
有石鐫行在二大字亦少帝遺跡

太姥山石刻



圖書在漳浦好景山石壁刻呂令峯傅公河六大字  
餘不可識呂名璠惠卿父也

名勝志在印石山璠字季玉景祐初進士歷漳浦令  
守湖懷二州見郝志

丞相巖詩刻

圖書在漳浦胡村山山有丞相巖宋丞相文天祥經  
此有詩懸書石壁考文山集景炎二年正月移屯龍  
巖三月至梅州則題詩在此時矣

劍歸閣碑

在延平府治後宋丞相李綱書

字側墓碑

在延平府城南宋汪應辰撰文

按聖錫緒興中爲秘書省正字以言事忤秦檜通判建州紹興三十二年以集賢殿修撰知福州見郝志

浮玉石

在順昌秋水澄空則字見焉相傳爲朱子書

山一覽

朱子書在延平府城內又有汲古井扁在建陽考亭

亦朱子書

北苑五咏碑

宋龐籍撰在延平府東吉苑里

按籍景祐間爲福建轉運使

釣臺

在延平府城南宋隱士吳儀嘗漁釣於此石刻釣臺

二字楊時有詩

按儀字國華南平人隱居橘溪上羅從彥師之元

祐間陳瓘薦之辭不就見郝志隱逸

南劍州湯漢謝雨碑記

三山陳漢刻石在南平萬福龍神廟

百花巖

在南平劍溪之東石壁峭立鐫隸書百花巖二字下有碧雲洞

吟室

在延平湛盧山朱子書建甯府志在松溪湛盧山

朱公山石刻

輿地碑目孫建甯縣北江先生側嘗聚徒讀書側與羣弟子相繼登第如葉祖洽游酢乃其尤顯者有山齋題名

按側字處仲建陽人熙甯中學究出身葉祖洽等

師之後爲將作監簿與族子汝舟號二先生見萬  
姓統譜

匙澗泉

古今碑刻考朱晦翁書匙澗泉三字在建甯縣資壽  
寺

甘棠碑

圖書在沙縣洛溪宋南強爲令有善政其去也道出  
此溪也人名路曰甘棠勒碑曰甘棠碑

按南強字子居山東人紹興咸道間知沙縣治事  
德化不事刑罰解職去民立甘棠碑以表去思見

郝志

賈沈文碑

在尤溪縣學陳瓊撰

適越而北轍越不可至徙越人而置於齊里則越語  
可易而爲齊然則氣質一定而不能自易其習者非  
以其不學與氣質之用狹道學之力淺習其所自習  
者未嘗察也天氣而地質無物不然人邈乎其間亦  
一物耳物與物奚以相違或哲或愚不繫其習乎思  
誠之道莫先於學務學之要在於求師顏子之不遷  
不貳得於孔子希顏之人將孰師焉葉公問孔子於

子路子路不對夫葉公有知人之明有謀國之忠愛  
賢而得民慎微而憂遠其事皆有可指其遺語之見  
於緇衣者亦可觀焉楚國之賢無出其右子路非慢  
賢者也魯有仲尼而彼不知焉則於其間也何足對  
哉陳良楚產也而能使北方之學者莫之或先故孟  
子以良爲豪傑之士爲其能悅周公孔子之道而已  
不知仲尼則雖賢如子高亦孔門之所不對者也爲  
士而稽古者可不鑒哉承元豐乙丑夏爲禮部貢院  
檢點曾適與校書郎范公滄夫同舍公嘗論顏子之  
不遷不貳惟伯濬有之予問公曰伯濬誰也公默然

久日不知有程伯淳耶予謝曰生長東南實未知也  
時予年二十有九矣自是以來嘗以寡陋自愧得其  
傳者如中立楊先生亦未有識也崇甯之初兄孫漸  
就學其門予在合浦始獲通問予之內訟改過賴其  
一言漸於是時亦以所聞警予之謬予始忽其言久  
而後知其爲藥石也今漸來天臺考其學益進聞其  
言益可喜陶染薰鑄有自來矣舉修步於南溟觀洪  
濶於北壑此可遠之基也始之不謀何以得此古之  
善學者心遠而莫禦然後氣融而無間物格而不惑  
然後養然而道凝山上有木其進也漸合抱之幹豈



一朝一夕之所可哉人之患在不立其基基立而不  
勉亦何以愈於彼乎物之終始可不嚴哉始識而終  
成同乎一默非言語之所能容也予以多言取禍尙  
未誅旒戴恩自幸不知歲月之久而生死之有二也  
既老且病於痺目昏簡編筆硯殆將捐棄今於漸之  
行不能忘言作責沈以貽之喜漸之能謀其始而篤  
之使有成也政和二年八月九日了齋書

鄭杰閩中錄云當時推崇洛學者盛傳其文碑在尤  
溪縣學今人罕知之者按了齋沙縣人

了齋井

閩書在尤溪縣治西通明坊井甚甘冽宋秘書監黃聲刻石記異

按黃聲大觀二年特奏名

青山

在建甯南門外青山宋陳瓘書

朱子井闕題字

建甯府汲古井在考亭書院內朱子題井闕上有嘉熙二字

雲巖石跡

閩書在歐甯縣雲巖昔有普濟大師坐化其上鄉人

祀之頂有二石大者如獅小者如鈴名石獅鈴巖右有雪巖雙峯並高連大師用指大書昇字於石字跡尙存今與普濟同祀並著靈響

勿繫辭

訪碑錄云在建陽朱子行書自易有太極起至逆數也止首有太極圖三字篆書無年月未有蔡元定刻四字

劉夢陽跋紫陽先生墨跡原刻在楚常德余既重修

彭衙 廟學鐫 先師小影暨 大司寇像於廟

因摹此刻於明倫堂北徒托金石以傳不朽入廟瞻

像登堂睹 墨 師模儼然儀形式法是在吾同

志口時 大明萬曆二十一年夏六月吉立知白

水縣口西蜀劉夢陽口識

邑人經魁林 篆書

王功載記考是書在宋乾道間書孔子易繫辭說卦  
三節凡八碑在明倫堂東壁依堂壁逆行至國朝正  
統三年戊午歷年二百五十舊刻漫滅知府周鼎重  
刻刊正順行教授廬陵 慶有跋

錢大昕金石文跋尾右朱文公書易有太極一段蔡  
定刻在常德府學明正德乙亥吉水鄧璞爲嘉定

縣儒學教諭復摹勒於吾邑之尊經閣下今移置明倫堂西南向刻手不精遜原本遠甚海隅士大夫罕見文公書得重刻本猶珍而秘之予在都門琉璃廠書市得此本蓋猶常德元刻筆法險勁精采四射殊可喜也

按諸家並言石刻在常德惟孫氏星衍云在建陽當初刻於此爲他處所重摹非一石也

九溪

圖書在武夷水光石石名晴川銷九溪二字倒影溪中相傳趙清獻公筆

蘆峯

宋理宗書在蘆峯

千巖萬壑

在武夷儒巾石蔡九峯書

報恩寺劉屏山記

在崇安報恩寺

李仲光慈惠廟記

在崇安興田

屏山詩刻

閩書宋劉子昂有屏山十七景詩朱子爲書刻潭溪

石上在崇安

通志曰劉子翬宅在屏山下中有六經堂又家園有  
蚤賦堂橫秋閣涼陰軒山館有萬石亭意遠亭懷新  
亭百花臺餘曠洞海棠洲蓮池桔林桂巖宴坐巖醒  
心泉南溪凡十七景子翬各賦一詩朱子書刻於石  
上

按彥仲曾除興化軍通辭歸武夷學者多從之號  
屏山先生見郝志

巖巖

在崇安攬石峯右靈石門上朱子書

崇安縣志作靈巖在武夷靈巖

九曲樵歌

朱子撰書在武夷

武夷山上有仙靈山下寒流曲曲清欲識箇中奇絕  
處樵歌閃聽兩三聲一曲溪邊上釣船幔亭峯影蘸  
晴川虹橋一斷無消息萬壑千巖鎖暮煙二曲亭亭  
玉女峯插花臨水爲誰容道人不作陽臺夢興入前  
山翠幾重三曲君看架壑船不知停樵幾何年桑田  
海水今如許泡沫風燈敢自憐四曲東西兩石巖巖  
花垂露碧毳毼金雞叫罷無人見月滿安山水滿潭



五曲山高雲氣深長時煙雨散平林林間有客無人  
識欵乃聲中萬古心六曲蒼屏繞碧灣茅茨終日掩  
柴關客來倚權巖花落猿鳥不驚春意閑七曲移船  
上碧灘墮屏仙掌更回看却憐昨夜峯頭雨添得飛  
泉幾道寒八曲風煙勢欲開鼓樓巖下水滎迴莫言  
此處無佳景自是遊人不上來九曲將窮眼豁然桑  
麻雨露見平川漁郎更覓桃源路除是人間別有天

滄洲歌

朱子書刻考亭行書

富貴有餘樂貧賤不堪憂誰知天路幽險倚伏互相

酬請看東門黃犬更聽華亭清唳千古恨難收何似  
鷓鴣子散髮弄扁舟鷓鴣子成霸業有餘謀收身千  
乘卿相歸把釣魚鉤春晝五湖烟浪秋夜一天雲月  
此外倦悠悠永棄人間事吾道付滄洲見朱子文集  
卽水調歌頭也

按紹熙五年冬朱子竹林精舍成復更名滄洲精  
舍此刻當在是時

茶竈

在武夷茶竈石朱子書

逝者如斯

朱子書在崇安

幔亭記

訪碑錄朱子行書在崇安

按朱子文集及武夷志俱無攷

西山蘭若寺宋敕碑

在崇安寺後殿左廊行書

即真館

閩書在武夷六曲溪紹興間有漁人得此石巨浪中

傍題子真書筆勢甚奇

趙抃詩刻

松挺寒聲竹鎖陰  
梵宮蕭灑稱行吟  
庭前花意自榮  
落門外山光同  
古今夜榻近軒  
孤月滿曉鉏尋  
藥亂雲深中間  
着了休休事不  
信歡愁解到心  
劉子昂次韻趙  
清獻陰字云石  
磴雲房隱澗陰  
當年清獻此清  
吟鳳池人物終  
難繼花縣風流  
直到今三尺翠  
碑遺墨在一林  
寒竹着烟深平  
生景仰高名久  
敢負他時遺愛  
心崇安縣志在  
報恩寺

錦江

在浦城大石溪石壁朱子書閩書朱文公訪友過此  
值山花盛開書錦江二字於石壁

上蔡先生語

朱子行書在崇安

蘇軾書雪堂圖石刻

閩書在邵武郡學明倫堂東齋圖甚工東陽周懋跋

連昌宮詞石刻

閩書在邵武郡學明倫堂西齋蘇軾書郡人黃永存

跋

周子太極圖刻

在邵武郡學

碑字

在邵武銅青石壁山宋謝紹祖書

繡溪

在邵武繡溪石上宋謝源明書

按源明晉江人嘉定中任泉州府見郝志

衛石刻

闕書在邵武縣九龍觀衛石出地三尺上有宋篆十  
二字俗名石爲龍尾

吏隱堂銘

輿地碑目在邵武葉儀鳳撰云樵溪之水清澈玉樵  
嵐之山翠可掬溪水之湄山之足月上寒梅擁修竹

按儀鳳紹興間曾任漳州教授

米元章題名石

閩書在福安湖山絕頂有積善巖石洞幽險有米元章題名刻巖石上

宋守王十朋石刻

在德化九仙山龍池旁鐫蔡崇隆進祝聖南池八字

真西山共極堂硯

浦城祖氏所藏

左足有共極堂三字隸書

鄭漁仲硯

福州李氏所藏

硯長六寸廣四寸高四寸背有夾漈草堂四行書左

足有鄭樵記三篆文爲磨刀痕所傷乃莆田鄭氏物也右旁有紀昀銘云惟其書之傳乃傳其研鬱攸於予心匪物之玩十八字行書左旁有邵齊然銘云曉嵐受詔續通志慢士先生以夾漈舊硯贈之閩谷居士爲之銘曰墨繡斑斑閱人幾觚稜剝缺字不毀夾漈有靈式憑此六百年後待吾子時乾隆丁亥正月共六十一字石材黝潤乃嶺羊老坑也

謝文節橋亭卜卦硯銘

此石吾友也不食而堅語有之人心如石不如石堅誰似當年採薇不食守義賢也



程文海銘

朱謝侍郎硯

大明永樂丙申七月洪水去橋亭易爲先生祠扣地得之

閩後學趙元□□

金石萃編按宋史傳稱謝枋得字君直寶祐中舉進士乙科除撫州司戶參軍卽棄去明年復試教官兼經科除教授建甯府未上吳潛宣撫江東西辟差幹辦公事坐事謫居興國軍咸淳三年放歸德祐元年知信州二年呂師夔定江東地枋得以兵逆之敗奔

信州歸夢下安仁進攻信州不守枋得入建甯唐石  
山寓逆旅中已而賣卜建陽市中有來卜者惟取米  
屨而已元至元二十三年集賢學士程文海薦宋臣  
二十二人以枋得爲首辭不起二十五年福建行省  
參政魏天祐欲薦枋得爲功枋得見天祐傲岸不爲  
禮天祐怒強之而北枋得卽日食菜果二十六年四  
月至京師問謝太后攢所及瀛國公所在再拜慟哭  
已而病遷憫忠寺見壁間曹娥碑泣曰小女子猶爾  
吾豈不汝若哉留夢炎使醫持藥雜米飲進之枋得  
棄於地終不食而死李道源撰神道碑至元二十六

年八月子定之奉柩還廣信明年九月葬其鄉之玉亭冀原門人誄而題之曰文節先生謝公墓又據行實載公四月初一日至燕京初五日死於驛不云在憫忠寺此疊山厯官殉節之大畧也橋亭解延通志在建陽縣南朝天橋舊名濯錦明永樂十四年圯於水十七年縣丞趙璧重建橋上有謝疊山祠祀宋謝枋得枋得嘗賣卜於此橋上邑人祀之此橋亭卜卦視之可考者也視銘識云程文海銘宋謝侍郎視大明永樂丙申七月洪水去橋亭易爲先生祠扣地得之間後學抄元丙申爲永樂十四年與通志合此銘

爲閩人趙元所鑄而云程文海銘宋謝侍郎視疊山  
官止於知信州未嘗爲侍郎其號疊山者謫居興國  
軍時謫所有西山層疊因有千載西山疊疊青之句  
遂以自號云疊山文集後附明山東道監察御史李  
奎褒崇忠節奏詞稱宋忠臣謝枋得弋陽人弋陽自  
歷代以來擅道學忠節之名者獨枋得一人而已枋  
得妻李氏永樂初已蒙朝廷登載烈女傳足以垂耀  
不朽奈枋得祠宇未立封諡未加後人無所稱仰如  
蒙准言乞禮部定諡褒贈仍行原籍有司創立祠宇  
歲時致祭云云而不詳是時朝廷准行與否又集後

附行實不著撰人時代姓名有云至元甲申黃華平  
大赦枋得乃出還寓於茶坂設卜肆於建陽驛橋榜  
曰依齋易卦雖小兒賤卒亦知其爲謝侍郎也侍郎  
之稱蓋始見於行實朱彝尊曰下舊聞引韓襄毅公  
集載韓雍請諡宋臣謝枋得疏竊見宋禮部侍郎謝  
枋得乞勅禮部翰林院議加贈諡云云是韓雍具疏  
以前先有禮部侍郎之官究不知加於何時又引景  
泰實錄載景泰七年九月以巡撫江西右僉都御史  
韓雍之請事下禮部於是少保大學士陳循等議按  
諡法遵德博聞曰文謹身制度曰節請諡曰文節帝

如所議行是文簡之論由於景泰禮臣之議並不因  
門人誄題之文皆所未詳也程文海字鉅夫避武宗  
廟諱以字行故元史傳名鉅夫傳稱鉅夫入元授宣  
武將軍管軍千戶世祖召見置之翰林爲應奉翰林  
文字進修撰至元二十年加集賢學士二十三年首  
陳興建國學乞遣使江南搜訪遺逸三十年出爲閩  
海道肅政廉訪使是疊山之被文海薦在二十三年  
却聘書流傳不朽雖鄉塾童孺皆能誦而習之其被  
強入都不食而死在二十五年硯銘皆述疊山不食  
之事似乎疊山入都時未嘗攜此硯行卒後流傳人

間而鉅夫官閩海因以銘之據陳太常兆崙詩註稱  
文海曾任閩海廉訪使適其時始獲此硯沈埋建陽  
橋下由亭吏失守所致越百二十餘年之後因建橋  
而掘土得之又越三百年輾轉入於京師爲宛平查  
氏所得查諱禮字恂叔號鐵橋宛平縣人得此硯時  
官粵西太守其後陞任蜀中終湖南巡撫宦轍萬里  
恆以自隨海內文人多作詩詞爲上下二卷併摹硯  
形銘記刻以傳世名卜硯集今恂叔子湖南觀察清  
尤護惜之昶得其搨本重疊山忠節故他硯銘皆不  
錄而獨存此併識之

文信國鐵印

印廣八分珠紐中穿朱文天祥二字周櫟園印人傳云侯官農夫野田中耕出歸一老儒余入閩欲以金易之不可予門人陳潛告予曰此老儒負郭田也凡家有疫祟者持此往鎮輒愈厚償之後只給一印紙每紙一星云云嘉慶十二年有吳市賣烟草者佩此印云從福州城外拾得後歸海昌陳徵君璽今尙藏其家



閩中金石志卷十二終

閩中金石志卷十三

嘉興馮登府輯

吳興劉承幹校

元

達魯花赤孛羅等武夷山題名

至元元年

至元後庚辰春浦城達魯花赤孛羅同崇安邑史林錫翁奉土司命造茶題在崇安題詩巖

瑞巖石刻

至元十年

徐從道偕陳夢兆朱元錫范彥章陳時已丑菊節范陽字羅天章題

武夷山題名

至元十一年

至元庚寅之春劍南毋逢辰修朔書院董役者趙必社安天民熊禾詹光祖彭文甫書在武夷題詩巖

按禾字去非號勿軒建陽人從朱子門人學咸治十年進士授汀州司戶參軍入元不仕築洪源書堂於武夷逢辰天麻間任福清州光祖天麟父崇安人居武夷

毋逢辰等武夷山題名 至元十一年

至元庚寅重三節蜀人毋逢辰督修武夷書院畢偕趙必社安天民趙若羅元豫詹光祖彭文甫劉應徐來親文公題刻在武夷響聲巖

按至元重修武夷書院舊志失載

武夷山題名

至元十一年

至元庚寅臘月八日古桂石徐夢奇德麟詣武夷拜謁文公祠下翌日與院教詹光祖泛舟九曲徧覽仙迹同遊宋奕章德馨後至者蕭九成期而不至者熊禾在武夷響聲巖

按夢奇元貞初任福州路總管同知見郝志

秋澗老人蟠桃塢詩刻

至元十一年

都會東南赤可夷衣冠文物見多儀儒風興盛狷唐館霸氣沉雄人釣池海近重城朝日早江園平野暮

潮遲道山亭迤斜陽晚一片瑤鑄晤語時至元庚寅  
夏仲重午登道山亭秋澗老人題男公孺侍行並十  
人劉三益王公口口福唐時口迄今三十八年正書  
在候官烏石山

雲峰居士鄭從龍墓志

元貞二年

訪碑錄劉肩吾撰正書在閩縣

楊忠翊等鼓山題名

大德元年

大德元年歲次丁酉十一月中旬行御史臺監察御  
史楊忠翊偕書吏楊仲舉福州府判郝謙公餘來正  
書刻石門

按郝謙元貞間任福州判官

脫脫木兒等鼓山詩刻 大德二年

海上諸峰劍戟稠茲山盤礪甲閩甌天風下控三千  
界島月旁通十二樓郡志昔常誇絕域版圖今始附  
中州六朝而後多詞客識得題詩到上頭總統三藏  
大師沙羅巴監憲公脫脫木兒簽司陳錫潘昂霄禿  
滿同余來遊鼓山大德二年春正月乙未福建閩海  
道肅政廉訪使濟南趙文昌題時靖也侍行長老在  
山傑公刊諸石是年四月初吉靖同耆宿吳綺陳子  
修來遊正書刻石門左

按脫脫木兒趙文昌大德間任閩海道肅政廉訪使見郝志潘昂霄濟南人官侍讀學士禿滿至治

間任福甯州

閩縣造萬壽橋記 大德七年

學士馬祖常撰

按閩都記大德七年建至治二年落成祖常爲記并刻萬壽橋三字於石祖常嘗同知漳州路官至御史大夫

九侯名山 大德十一年

訪碑錄僧無碍正書在詔安九侯山石

石門李良傑題名

大德十一年

訪碑錄正書在永福

按良傑泰定間知泉州總管又嘗爲永福縣尹郝志不詳年月此題名當在縣尹時也

方廣巖題名

至大三年

至大庚戌潘朝海常世與洪良玉咏於望仙閣天宇澄清人境俱勝口畔澤翁書鐫永福方廣巖

方廣山石刻

闔書在永福縣方廣山元邑人王翰鐫飛佩二字又里許有用文與迨東薛朝晤諸人來遊鐫八分書四



十一字徑尺筆法蒼古亦妙筆也用文卽翰字也又  
宋黃非熊讀書於方廣山巖撫山中景爲十奇渤海  
吳元卿訪得之爲序而刻諸巖壁見閩書

按續志作飛佩鐵壁王翰書翰字用文廬州人除  
福州路升同知又升理問官綜理永福羅源二縣  
行省郎中元亡屏居永福山十年見八閩通志

連江縣重修廟學記

皇慶二年

福州府志教諭黃仲文撰

按仲文郝志無攷

江甯楊剛中等鼓山題名詩刻

皇慶元年

飛構表林崇下與會雲平陟嶠良已超况乃臨滄瀛  
盤盤汀樓分離離海帆征曙發沙旭近秋澄涼區明  
甕高慨徂暉撫道空遺名混混空自期營營定何成  
名峯冒南州靈境仍幽親春結丹樹梯秋明紫烟岑  
□遠遂幽囑清曠寄遐心惜無同懷登共引芳醕斟  
冷風春飛淙絕澗調羈禽誰爲鍾子期續此雲海音  
皇慶壬子秋九月晦日江甯楊剛中志行來遊挹江  
海之清風訪古人之陳迹顧瞻感慨因寓之詞太末  
胡夢霖止水後至請列諸石乃書之正書刻水雲亭

按楊剛中字志行上元人泰定中除江漸儒學提

舉至正末爲江浙提學皇慶中嘗爲福建道照磨  
詩刻當在此時

連江重修湧泉寺記

延祐中

邑人陳炎圭撰

福清龍首橋記

至治二年

知州吳濤撰

按吳濤泰定間任福清州見郝志

錢光弼等卧龍山題名

泰定二年

在侯官卧龍山彭城錢光弼任福建轉運使之明年  
漕暇游安國得愛亭故址萬楚舞翠品石獻奇因茲

構新易名翠楚時泰定二年七月望日男守護侍正書

李良傑等武夷山題名

泰定三年

朝列大夫建甯路府判漚淵李良傑偕崇安主簿樵川高道孫冲祐住山張與玉等泰定丙寅孟春曾遊在崇安大藏峰

按建甯路府判李良傑崇安縣主簿高道孫郝志並失攷

連江縣重闢廟學記

天曆元年

教諭林坤光撰

按林坤光郝志職官失載

焦公等鼓山題名

至正二年

至正壬午八月寒露易陽參政焦公鎮陽郎中元漢卿宣慰王元應本路宣慰黃頭總管岳侯運同劉潤父東平信雲甫來遊正書刻石門

按焦公名德祐字寬父雄州人任行省參知政事  
見郝志

劉順老等題名

至正三年

至正三年癸未重九福唐劉順老偕子應生懋生順生恩生志生爲太監拂塵前田鄭杓永陽梁說同拜

按題名在候官烏石山分書

郝彥澤等鼓山詩刻 至正

至正戊寅歲人日幽州郝彥澤永嘉劉儼孫同登小  
頂峰訪靈源挹天風海濤之勝彥澤題詩曰趁時驢  
背穩於船且走東峰劣勦巔風送海濤來異國人從  
石磴上青天環開勝槩口曾次帶水平疇盡目前何  
日英雄洗兵馬放余來此做林泉正書刻鼓山

按劉儼孫至正間任連江縣至正無戊寅當爲戊  
子戊戌之誤

八都兒等烏石山題名 至正七年

中書省斷事官八都見丁□□□令史王敬先□  
□□江南行臺監察御史安止善□□書吏會能□  
福建閩海道廉訪副使馬合□□麻德卿索士儼知  
事張允中照磨王正己同登茲山實至正丁亥冬季  
乙酉日也正書在候官

按斷事官令史監察御史郝志職官不列名目廉  
訪使知事照磨諸姓氏亦失攷

僧家奴等道山詩刻 至正九年

訪碑錄僧家奴等作任允八分書在候官

追陪偶上道山亭巒嶂層巒遠郭青 子迪  
萬井人家

鋪地錦九衢樓閣畫幃屏

元卿

波搖海月添詩興座

引天風吹酒醒

本初

久立危欄頻北望無邊秋色杳

冥々隸書刻蟠桃塢

右憲使崞山僧家奴元卿公僉憲奧魯赤文卿公申

屠駟子迪公赫德爾本初公暇日冥集聯句也

譚 黍

備憲幕重惟諸公文章名士南北偶隔數千里同仕

于國以道義相處爲娛誠一時之嘉會因勒齒石以

紀我元文物之盛云至正九年八月望日經歷趙諱

識知事任允書憲副朶兒只班善卿公登斯亭覽山

川之勝槩觀羣公之賦咏曰此盛事也遂題於後



按憲使僧家以僉憲吳魯赤申屠駟赫德爾憲副  
朶兒只班經歷趙譚知事任允皆可補志乘之缺  
申屠駟高郵人監察御史福建廉訪僉事見萬姓  
統譜僧家奴見於元史凡四未知爲何人也

瑞巖紀遊石刻 至正九年

至正己丑清明前一日子沿檄至海口與鹽司令字  
羅天章司丞盧永年祥卿管局范公懋從政同登巖  
巖是日風氣清淑海嶼在望蓋勝遊也三月十五日  
上元楊湖大舉書八分書刻瑞巖玉虛洞

大開圖畫 至正九年

時至正己丑菊節范陽李羅天章建正書刻瑞巖

林銓等鼓山題名

至正

將軍石清源林銓至正庚辰季秋六日正書刻將軍石

按至正無庚辰當爲庚子庚寅之誤

朶兒只班等鼓山題名

至正十年

至正庚寅五月十九日憲副朶兒只班善卿僉憲奧魯赤雲卿赫德愈本初公餘出郭閱稼因遊靈源洞勒石以紀歲月云譯史廉丑斯書吏劉溶黃齊賢王德政馬居禮呂鼎李元遠元臣奉差辛元振程廷璧

待行時住山海翁長老隸書刻靈源菴口

按朶兒只班至正中任福建肅政廉訪使海翁卽

如山見鼓山志

瑞巖紀遊石刻 至正十一年

至正辛卯夏里人曹希建鄭克裕陳叔亨林居正陳宗魯莆田鄭宗晦來遊清賞終日分書刻瑞巖紫霄亭趾之後

許從宣等蟠桃塢題名 至正十二年

至正十二年龍集壬辰九月九日閩海道肅政廉訪使許從宣僉憲普顏帖穆兒郭興祖乃麻歹經歷王

欽知事彰門磨不顏帖穆兒同登茲山是日也天宇  
沈寥霜風初厲感萬物之脫口思口隼之口擊仰瞻  
斗極對越正邇不徒昇高望遠以爲樂也遂命從事  
者題名勒石以紀勝遊云八分書在侯官烏石山

按乃麻歹廷祐間任福清州見郝志廉訪使許從  
宜僉憲普顏帖木兒郭興祖經歷王欽知事彰門  
磨不顏帖木兒並足補元職官之未詳

李安世鼓山題名 至正十三年

訪碑錄在閩縣正書

瑞巖紀遊石刻 至正十九年

溫陵盧希韓徵賦海口鎮公暇至此同遊者陳國輔  
顏希道陳仲宣李月海鄭宗晦上官仲德陳元才陳  
士吉鄭克裕僧孤巖時至正己亥十一月二十一日  
刻正書刻瑞巖天妃宮後

閩海道廉訪副使寶哥去思碑

至正十九年

林興祖撰完則篤行書江南瞿氏拓本

按興祖羅源人舉進士曾官道州總管寶哥畏兀  
氏至正初爲閩海道肅政廉訪司副使民樂其治  
爲立去思碑見八閩通志

高昌兀奴等鼓山題名

至正二十年

至正二十年庚子春二月三日閩憲副高昌兀奴國  
器僉事新安鄭潛彥昭同遊鼓山登天風海濤憇臨  
滄亭舉觴稱壽留題刻於石止菴鄭至正書刻靈源  
洞

按鄭潛欽縣人任泉州路總管遂寓居懷安至正  
中爲北海廉訪副使于縣南立白苗陽岐二義渡  
至今爲鄭公渡鄭至昭先之孫

王伯顏等道山亭題名

至正二十年

至正庚子夏南臺羣公會于道山亭歷覽山川興恨  
今古刻石以紀歲月都事王伯顏不花彥芳監察御

史易晉刺金仲達瑣飛鵬舉現口用賓通事口顏帖  
木兒仲賢宣使孫士敏汝學察史武徵文口高忠彥  
實土宜升宜揚志口尹幕史達蘭不花

按王伯顏字伯敬霑化人至正九年以朝列大夫  
守福甯見郝志監察御史通事宣使察史幕史諸  
職官郝志並失攷

連江縣興學記 至正二十一年

揭竑撰

按竑字伯防侯斯子歷官至肅政廉訪司事嘗守  
建甯解陳友諒之圍復延平等三州改江西行省

未起以工部郎中召竝亦作法見郝志

瑞巖紀遊石刻

至正二十一年

大元福建行中書省奉訓伯亮與耆士李月海鄭叔  
珍王子東遊謁僧孤巖留宿時至正二十一年正月  
誌隸書刻瑞巖仙扉傍

張閻等天秀巖題名

至正二十四年

至正二十四年歲在甲辰十一月戶部員外郎張閻  
以董鹽筴至三山翰林國史院編修官迺賢

缺七字

至十二月七日登道山亭讀曾文定公記飲霹靂巖  
畔轉□□□又飲焉又自觀音巖下逕仁王與東登



東壁亭伏觀福建行省平章燕赤不花公墓勒皇太子所賜文武忠孝四字偈石□□望海東升二亭又飲焉日暮迺□□□□之會可爲千載之故事也從行者戶部掾□□瑞□□□伯□□□□□□德山記之者□□行省□□□□□□正書在侯官烏石山

按張閻燕赤不花郝志職官俱失攷

傅好禮烏石山題名

至正二十四年

訪碑錄正書在侯官

程世京等鼓山題名

至正二十五年

至正乙巳九月望廣平程世京建安徐時憲郡人吳海黃厚同遊宿此篆書刻大頂峯

按程世京字伯崇徐時憲字崇度吳海字朝宗黃厚字伯宏

薛朝暉等鼓山題名

至正二十五年

至正二十五年秋八月朔日遼東薛朝暉靈武王用文濟南李君憲會稽胡溫來遊篆書在牛山亭

按王翰時任福建行省郎中薛朝暉至正十四年狀元胡溫字遵道

贊華山石刻

至正二十五年

至正乙巳秋遼東薛子顯靈武王用文東平馬主良  
晉安趙道生朱騏秦川王克恭分書在連江寶華山

瑞巖紀遊石刻 至正二十六年

大元至正二十六年丙午四月二十五日汝南蔣士  
暹里人陳積中潘騰晉安王裕同遊繼而至者郡人  
卓赤隸書在福州瑞巖半邊亭左

按潘騰福清人至正二十三年進士

瑞巖紀遊石刻 至正二十六年

至正丙午秋七月二日里人陳舜玉邵文德盱江施  
克讓遊正書在瑞巖過來橋前

瑞巖紀遊石刻

至正二十六年

至正丙午八月廉吉祥同下元善潘君迪林君賢潘  
騰陳積申遊道士姚海陽僧無門相從元善子神仙  
保州吏李廉侍隸書刻瑞巖觀音洞內

瑞巖紀遊石刻

至正二十七年

至正丁未孟冬望日榕下徐子正偕寅友鄭彥通里  
人林吉樞林允文同訪羽士施柏巖遊正書刻瑞巖  
觀音洞左

醉老峯題名

章容元度鄭燭宗晦鄭詵子釋姜柏子貞鄭畊子山

來觀薛老峯字隼尾法隸書刻烏石山

香山洞

陳瑞立鄭燦書正書刻瑞巖

東臯刻石

王用文鐫隸書東臯二字於石在永福

龍塘刻石

元王翰隱居於此刻讀書處三字王偁刻曲水流觴  
四字於石郡人李時成有記在永福

赤壁

閩都記永福林壁色厓赤壁元王翰刻赤壁二字於

石

鈞磯

在永福東溪石上元王翰書

乘雲

正書刻鼓山半山乘雲亭石上元王用文書

鄭至詩刻

謹用先祖日湖文靖韻鄭至詩正書刻鼓山石門

轉運司公堂記

郭朶兒伯臺撰在福州

按朶兒延祐中爲興化路總管嘗浴木蘭陂建通

濟橋見黃志

福清學記

林泉生撰

按泉生永福人天厓中進士初爲福清縣同知後知福州累官翰林院學士謚文敏見郝志

宣慰司重建譙樓記

柳貫撰在福州

勉齋書院記

元貢師秦撰

至正十九年冬十月福州始作勉齋書院明年秋八

月告成丁亥廉訪使率郡大夫士行釋奠禮己丑經  
畧使李公國鳳謁祠下用便宜署今額以儒人張理  
爲山長執事者間具本末請紀於貢師泰曰書院徧  
天下而閩中爲盛大約祠徽國朱文公帥弟子居多  
若延平武夷考亭建安三山泉山龍溪雙峯北山之  
屬皆是也勉齋先生質文公高弟獨無專祠顧非蒞  
政者之缺歟昔者僉事張引嘗圖經始以調官浙東  
不果經歷孔訥銳意作興以拜南臺監察御史又不  
果未幾行部閩廣適郡士林祖孟祖益請以太平公  
輔里故宅一區爲學宮厥位而陽廣輪合制遂倡成



之而廉使贍思丁副使元奴僉事亦憐真必刺的納  
劉完者鄭潛經歷荅理蒙古知事黃普顏帖木兒照  
磨傅居信協心相事議若出一且移鄭君並視而佐  
以屬史王蘭焉行省平章普化帖木兒聞之亟發白  
金五十兩及租田一百五十畝奇以給以贍於是卽  
舊以圖新拓隘以增廣禮殿中崇象聖人之燕居祠  
宇旁峙嚴先生之祀事堂曰道源著師友之授受也  
閣曰雲章以鄭君正字端本時所得皇太子書麟鳳  
龜龍四大字刻置其上也堂後疊石山曰小蒼峯不  
忘先生讀書精舍之名也齋左曰凝道右曰尊德

士有舍待賓有館燕休有室更衣有次庖福庫庾各有其所重門衙衙層廡翼翼瞰以方池度以石梁其周九百八十四尺奇東西廣九十尺深視廣之四雄崑偉觀穆然靜深然後斯道之統有所尊而講學之士知所向矣惟子之學蓋亦得於先生者請文諸石以紀其成顧師秦荒陋何足以知此然竊聞之斯道也伏羲神農黃帝堯舜禹湯文武周公之所以爲治孔子顏氏曾氏子思孟軻氏之所以爲教不幸而變於管商慘於申韓雜於荀楊暴於鞅斯磔裂破碎於毛鄭賈馬王范之徒幸而唐之韓愈氏能以所得著

之原道之書然其於性也主三品於仁也專博愛則  
猶未免於不詳不精之失焉至宋全盛濂溪啟其源  
伊洛邇其流渡江再世文公始集諸儒之大成使千  
載不傳之道復明於天下後世吁盛矣哉於時門人  
弟子聰明卓越固不爲少然求其始終不渝老而彌  
篤者先生一人而已先生因劉子澄一拜文公於屏  
山之後卽慨然以斯道自任聽風聲於屋頭對孤燈  
於天曙其堅志苦思爲何如也自是得執子壻之禮  
從登廬阜涉彭蠡過洞庭望九疑宦遊淮江湖湘吳  
越譚問罔不惟口傳心授於師門者愈久而愈博而

其所見名山大川淵深高厚皆有以助夫精微廣大之學矣是故徵諸事業則城安慶禦漢湯最爲偉蹟著之方冊則四書通釋儀禮通解尤爲有功蓋先生有志於斯文以陸沈下官不能大行其學固可深慨然聖賢墜緒非文公無以明文公遺書非先生無以成則斯文吾道確乎其有所歸矣先生沒其傳之著者在閩則宓齋陳氏信齋楊氏在浙則北山何氏江以西則臨川黃氏江以東則雙峯饒氏其久而益著者則西山眞氏衍義諸書凡今經帷進講成均典教皆自先生講論之餘也嗚呼先生之道傳之後世生

生之書行乎天地孰不想慕其高風漸被其餘澤况  
蒸峯箕山之間雲烟蒼莽神氣流行慨然肅然猶若  
有見乎其位聞乎其容聲者乎書院之作其有功於  
世教豈曰小補云哉遂記不辭先生諱幹字直卿御  
史瑀之第四子累官至大理寺丞轉承議郎致仕勉  
齋其自號云

按師秦字泰甫奎子曾官江浙參知政事又任福  
建副都元帥見郝志記中所列職官皆可補志乘  
之缺

重修福州路記

貢師泰撰

福州中七郡而拾連山東馳衆水皆滙於海地氣磅礴物產蕃阜自無諸以兵佐中國常袞觀察其地朱子以道學淑諸人千載而下號稱鄒魯國朝始建行尙書省提刑按察司後更省爲宣慰司按察爲廉訪司近又罷宣慰司立行中書省大官臨蒞其上守吏嚮嚮日事迎謁一據按署牘輒復起去故郡治敝壞幾無以比左右愕視歎息卒不暇議所以修治者至正庚子春子董漕閩廣館於府中因謀葺之或曰子幸以老請居幾何時願欲巨費耶子惟君子之所以

處其身也不以物我而有豐嗇不以久近而易勤惰  
况節舊以圖新因廢以補陋其猶易於成功乎於是  
稍節俸入俾通守阮世隆主治之而鹽守僚佐咸曰  
吾儕之所不暇甚幸尙書之辱貺也乃皆協心相事  
曾不踰月工以告成而聽政之堂退休之室公牘之  
署與夫涼軒燠館重門修廡廓然若闢奧焉加深矣  
既事進執事者於庭而告之曰南方不靖踰十數年  
將士苦於戰鬪黎庶勞於餽餉海隅遺黎殆無以生  
命是之葺豈徒與大夫士娛其心便其體而已哉凡  
有事於斯堂者亦將惕然而懼蚤夜孜孜思有以勉

吾力之可爲以盡吾職之當爲庶其無負於君國子  
民之道爾不然則賞罰出於愛憎曲直徇於賄賂瘠  
其民而肥其身聚於上而怨於下馳騁出入自以爲  
得計天地鬼神其可欺乎記諸壁間用勸來者且以  
自警云

按通守阮世隆舊志失攷

左丞雨右丞雨石刻

在郡城烏石山東南一刻左丞雨旁細字云至正癸  
卯夏秋不雨禾漸枯分省鄭收率都鎮撫吳維賢從  
事官宋應福於七月三日設壇請禱越三日大雨土



民俞志甫等勒石以記一刻右丞札刺立丁持節過  
蒲議捐俸修廟學大雨隨至蒲人咸喜曰此右丞公  
雨也文學掾莊邦元請於郡官鐫茲巖石以志

按分省各官舊志皆失攷

樵谷山

在仙遊麥斜巖元世祖御書賜林璧卿

按璧卿號樵谷蒲田人精易學世祖欲授以官力  
辭歸隱學者稱節隱先生見郝志隱逸

海天一色

在晉江西山巖石上元王翰書

古井石刻

在海澄青礁三川井四川井上刻元進士顏貴來六  
字

萬歲寺定光塔銘

邵武王鎮成撰

福城之東山惟九仙岌岌浮屠上出層巔八方翼舉  
七級梯連深蟠厚載高薄重元昔在唐季王公啟土  
相攸茲山大建神宇旣闢招提迺標翠堵厚壤祛幽  
圓琛發貯潛符嘉徵建號定方載禩四百作鎮藩方  
漂搖風雨經歷星霜棠槐隍堊芬簞披猖惟寶峯師

興念惟惻弗葺斯墜靡遑居食其徒慨然問義感激  
有志必就惟堅願力踵門於羨行市丐餘粟積於寸  
積重於銖石斲川運材伐山輸堅良締構弊故更除  
寒暑六經載營載度業業金碧峩峩丹腹制若地湧  
視猶天作育國分光圖澄識鐸惟慈偉功匪志弗成  
卓哉斯願振古作程天地至久日月至明侔貞配永  
視此刻銘

按鎮成字元鎮邵武人以薦受江西儒學提舉命  
下而卒著有尙書通考等書見郝志文苑

上華洞石刻

在將樂有至正年人題名漫滅不可識見明楊載記

龍津

訪碑錄趙孟頫正書無年月在松溪風屯牛皮灘巖  
上

逆峯隸書十三景

名勝志元馬周卿鐫壁曰冠豸曰蒼玉峽曰雲棧曰  
天梯曰桃源曰清如許曰夫容渡曰金字泉曰雲深  
處曰天光咫尺曰蒼谷曰靈虛曰小崆峒在連城西  
吳澄大乾祠銘

闕書在邵武元草廬吳澄題大乾祠壁隋大業十四

年戊寅泉守歐陽公滿歸至此夫婦俱溺水死時楚  
林士弘長樂寶建德魏李密定陽劉武周梁梁師都  
秦薛舉涼李軌涼蕭銑各已僭號割據而唐李淵以  
代王侑帝於長安是年二月江都有變字文化及立  
秦王浩五月李淵奪侑而帝以侑爲唐王世充以越  
王侗帝於東都公洛人也將安歸平生蓋不如死矣  
噫公之心誰其知之後六百七十七年春二月朔臨  
川吳澄過廟銘壁題

按草廬曾任漳州軍事判官見郝志失攷年月

吳志淳千字文

金石林時地考在福州府學隸書

按志淳字主一無爲州人以工書名仕元不達入  
明與高季迪劉青田並名

歷代帝王聖賢將相像

金石林時地考元玉林居士刻於蘆峯書院閩中張  
士賢敘

中順王公去思碑

閩都記侯官皇華亭左立元福建閩海道肅政廉訪  
司副使中順公去思碑

墨池

閩都記在大夢山之陽元時有人晦迹於此刻墨池

二字

無名木

無名木宋時木也莫識其名元施德鐫無名木二字

於石在南安九日山

如此江山

元王翰書刻石九日山

閩中金石志卷十三終

關中金石志卷十四

嘉興馮登府輯

吳興劉承幹校

舊刻未詳年代姓氏以地分系

于山光孝觀二斷碑

三山志九仙光孝觀于山碑記云我有一庄園寄在  
于山邊于山九道士名呼爲九仙輒然來相賀磊老  
自相傳李公來戰日此無無一物只有一積金寄在  
于山莊不是中山中只有隴西郡我住東西城莊在  
于山下有人信不信但呼碑中話只看于山松于山  
金出現不在路旁只在中牘西拾得無分張時人莫



笑金泥師拾得金泥也有富太和二年于山二斷吾  
年乙丑金園一片寄在山前在前左臂不歸庚申須  
歸乙未留傳子孫衣錦次第時人見碑吾今在世

按來齋金石考云彭木厓世居于山麓其先人明  
季淘井出石一片廣可踰尺縱尺五六寸刻文九  
行我有一庄云云按太和晉廢帝年號也碑文乃  
爲識語多不可解其字宛然晉人風度但氣骨不  
勁少謝義獻耳又閩督李率泰割福城之東以駐  
靖南王番兵木厓移居衣錦里偶置熨斗石上恐  
然有聲石斷爲二木厓稱二斷居士謂李公與錦

衣石斷皆應識文也今彭氏歸故宅石藏其家據此則此碑宋以後湮沒至明季復出井中今石爲侯官趙編修在田所得他日當訪之疑亦如郭識僞託耳

翠楚

在侯官箋經臺正書

古碑文

閩書唐會昌時除佛汰僧有村民鑿井三丈餘得一古磚上刻僧旻興法四大字以獻於州州承朝禁取磚毀之至王審知請僧旻住持大興法教而磚文

始驗

怡山古磚識文

閩書後唐光啟丁未歲衢州爛柯山道士徐景立取  
土仙壇東北隅得瓷瓶七口各可容七升水中有炭  
上總蓋一青磚文曰採枝石川伐壇壤不須結未滿  
一千歲自有系孫列後來是三皇湖水蕩禍殃巖逢  
二祚間未免有銷亡子孫依吾道代代封閩疆黃滔  
作丈六金身碑頌王審知仗鉞之威實應蓋碑之識  
云

按五代史蕭梁有王霸者王氏遠祖也居福州

怡山爲道士常云吾子孫當王于此方乃爲識瘞  
壇下光啟中爛柯道士徐景元廟地得之其詞云  
云解者湖水蕩禍殃謂潮除禍患開基業也巖逢  
二祚間謂陳巖逢潮未幾而亡也代代封閩疆謂  
湖與審知兩世也

古籀文石刻

郝志在鼓山里魁崎有石橫亘五十餘丈刻籀文其  
上多不可識

石室仙篆十字

三山志仙巖羅漢院有書十字不知何代書也天矯

崖間酒落奇妙古號仙篆歐陽文忠得之喜其無鐫刻之迹如指畫成文欲以蕃夷金書字圖號譯之未暇也蔡端明釋曰貧道守真乙中有不死術亦莫得其據一在安仁寺仙人山有篆如雲雷文蜿蝟模重疑古羅漢字及僧憚墨螭之費燎斲而瘞之一在中和寺黃坑之崖左欹刷生如華葩熟如槁燒或水消而未旣或布口地上枝葉不屬而脈絡皆通疑開闢之初孕雲結寶若龜圖馬籙未易以今書通宋政和三三年陳令武祐得安仁二字於沙燼之中又於上生院僧景純所得所藏善本四字並羅漢中和字錢韻

木通志本此而云在永福六洞山石室按陳思寶刻  
叢編引集古錄云觀音寺古篆十字在福州永福縣  
觀音院後山上閩人黃孝立爲之說曰山無名而甚  
高峻石皆頽無復鐫刻之迹如人以手指畫泥而成  
文或隨圖石之形環布之孝立嘗至廣州見南藩人  
以夷法事天日夕拜金書字圖號天篆者視其與此  
正同然不能考也今世人亦有以道家之言譯之者  
勒道守三一中有不死術亦莫得而詳焉

集古錄目無名書凡十字體如篆籀其文非字書所  
有在福州永泰縣觀音院後山上如以手指書石而

爲非人迹也按勤道守三一中有不死術據集古錄  
但言今世人三山志指爲蔡襄三作眞乙作一殆相  
似之謠據歐陽乃在永泰觀音院後山

鈞龍臺石刻

三山志舊有人得一石於城南鈞龍臺刻云接晉太  
康三年太守嚴高圖越王山南之西勢以咨郭璞云  
方山秀拔於前三山環峙於後八百年後大盛識曰  
可間萃兀創危亭八百年前兆此名天降元精如漢  
佐岳陶靈氣似周臣中坻不見容舫路古渡應無病  
涉人好是褰裳待今日胥浦坊中人挺生年世浸遐

石刻今不復存惟故老口傳猶可據云按此亦後人  
僞託

狀元峯

正書徑二尺鐫九仙山陳誠之讀書處

鵬海天風

喜雨臺

杏壇

小華山

廓然臺

以上在閩縣九仙山



防虞

在布政司署月臺無年月書人

謙山

在閩縣鼇峯書院交翠亭邊石上草書

仙井

正書在鼇峯書院仙井之石欄不書姓名歲月

登龍

在閩縣龍門

比濟潭

在閩縣九龍山龍潭

乳泉

閩都記在侯官羣鹿山下泉甘而冽其傍一石刻此  
三字續志在閩縣羣鹿山

大章臺正書

濤霄臺正書

同陽峯正書

吳香臺正書  
活水正書

青谷臺正書

白石正書

神天臺篆書  
石丈分書

望湖峯正書 蒼岩行書

以上在侯官烏石山

靈泉

羅漢泉

鳳池山

正書刻鼓山

梅川 立巖 列岫 第一奇峯 豹園

霹靂巖

天秀巖

石麟雙峯夢

白海南浮青嶂外烏山西望碧雲重

在侯官烏石山俱正書

岡山

在侯官玉尺山篆書

靈洞巖

在侯官芙蓉峯

卧龍山

在懷安縣安國寺石刻卧龍山三字程師孟有詩

蓬萊峯

在于山正書無年月姓名

壁立干霄

在于山橫列正書無年月姓名

廉山

在侯官大夢山多奇石刻廉山二字

第一山 小有天

在長樂六平山石洞壁上

陳令津

在長樂屏山石船

冠峯

在長樂冠峯

天子萬壽

在長樂萬壽山

龍頂峯 豹變巖

在長樂龍頂山

仙篆

在福清鹿角山石上

福州府志引閩書山中大石上有仙篆數字人莫能曉

別一洞

在福清石竹山

蓬壺

在福清黃蘗山

福州府志作石竹山

龍淵

篆書作李斯勢刻福清黃蘗山

天上雲居人間仙境

金華趙崇枝刻在連江雲居山

觀瀾

在連江香爐山

漁滄太乙之門

圖書在連江龍江有漁滄潭古石刻此六字

寶華福地

在連江寶華山餘字漫滅不可讀

奇章別墅 雪浪雲根 蟠龍

在連江橫槎江岸

解醒泉

在連江秦川

洞天

在連江文筆山

醉翁石

在連江登巖嶺

彤雲碧海

在連江雲居山



四佛境界

福州府志作入佛境界連江縣志作入在雲居山

在連江坑墩

降虎 雷移

在連江寶林寺

連江縣志傳爲晦翁書

龍峯

在連江定岐山

輕避重賤避貴少避長往避來

在連江東禪寺

福州府志作東禪嶺

章仙峯 粘雲

在連江爐峯石壁

漁村

在連江百丈巖

鳳仙

在連江文華山

松崗

在連江松嶺井上

依緣

在連江苦竹溪石上分書

界外乾坤

在連江覆釜山

青溜石

在連江北茭海崖石峽上汗吐成字拭之則滅少頃復明土人以爲仙蹟

清賞

閩書在羅源登高山石上舊刻此二字又羅源松嶠山亦刻清賞二字爲元泰定中刻

鐵印

在羅源蓮花山筆硯峯

文殊山刻

在羅源縣北城隈其狀如伏獅上有羣石森起曰羣  
玉峯石上刊章叟洞三字邑進士林茈爲銘刻石

妙喜洞

在羅源臨濟里半山有石洞刻妙喜洞三字石下有  
寺建於元名人有遊咏

羅喜洞

在羅源徐公里西山相連曰大茅小茅山中嘉木蔚  
茂昔人徐登修煉於此得仙故名仙茅上有泥鼓棋  
盤石絕頂有刻羅喜洞三字洞深數丈內多奇石

道遙洞

仙泉

在羅源仙泉井

冠峯

在羅源羅平里

沈子巖

在閩清沈子巖下水中

甲高巖

在閩清半嶺石上

天章巖

正書刻瑞巖

紫霄巖宋襄詩刻

名勝志在莆田紫霄巖宋襄有詩刻石而缺其半詩  
云十里迢迢上紫霄半空飛翠望中饒雷轟羅漢峯  
前石路入天臺洞裏橋

浮山詩刻

名勝志在莆田紫霄巖東爲浮山石上鏤一詩紫霄  
下五里絕勝有浮山灰水分蒼玉歛崖積紫斑土人  
多不辨木客詎能攀欲買漁舟隱其如身未閒不著  
姓氏

妙高峯

名勝志在莆田香山巖有古刻妙高峯

古稽文

在莆田九華山一名陳巖山山有石面平如削刻文  
縱橫若篆籀楊慎丹鉛錄云莆田陳巖山有自然仙  
篆以紙摹之形類禹篆宋正字方彛有詩云何人登  
眺睨絕頂一樹一石探幽奇蟲文鳥篆不可識如讀  
蚬屨神禹碑纍纍蟻山著石面此非所有能無疑細  
看大石深孔窺舟人操篙跡惟遺乃知此山千載前  
洵湧何作海渺瀰蛟龍魚鼈占窟宅不省造化能密  
移

泉井

在莆田後街又有壽泉井在大道街祿泉井在長壽社邊俱有石刻

鳳山石刻

在莆田縣城中永福寺在焉山形甚隱有石刻八天王塔寺左有義井僧涅盤識云市連義井歲時豐水連壺公文物盛

仙臺峯石跡

在莆田縣西山上有石棋枰馬蹄跡又石上有日月逝酒樂五字不知其詳字畫恍如鐫勒遠則了然近



乃滅跡前有石巖深窄披之石趺蹇然

高山石跡

在莆田海濱山頂有峯名文筆其上石壁有苔紋宛然文筆峯三字字刮去復明旁有石室俗呼仙姑巖

鐘石山石刻

在仙遊縣山形如覆鐘下有石門名仙門洞刻石云古有樵夫遇一翁野服道裝遊於石下問曰翁何自家翁曰家此五百餘年矣樵夫怪曰何不見屋宇門戶翁指石石開化鶴飛去

石山石刻

在仙遊石所山雲居巖古篆百餘字如龍蛇糾纏不可識

石碑嶺石刻

輿地碑目石碑在莆田縣南十里上有石平潤有鳥跡書不可曉据通志此刻在仙遊字作鳥篆人無識者

大飛書院滌 挹飛 煮茗 蒙泉

俱在仙遊大飛山仙遊縣志宋紹興間喻景山時隱居處石刻在山門石壁

小夾滌

在仙遊附鳳巖鄭漁篆書

敲金戛玉

仙遊金石山石篆此四字

趙永嘉詩刻

在泉州寶蓋山下有趙永嘉石刻詩云青山吐出白  
龍開我是地仙趙秀才嘉善無魚餐得去永嘉有虎  
喚能來

晉朝檜

名勝志泉州紫極宮古檜旁有石刻晉朝檜三字宋  
彌安有晉檜詩

泉窟觀瀑

在泉州清源山彌陀巖閩書巨石刻泉窟觀瀑等字  
陶石

在清源勢至巖閩書石上留題皆陰刻此獨陽畫旁  
爲清泰巖有石刻曰仙苑

清泉分流之界

在晉江縣舟峯山

萬遂山石刻

在晉江縣山有石刻極目二大字又有詩曰青霞道  
士老無齒松下烹茶手自分話到夜闌山月落又歸

白鹿入深雲其處又有白鹿洞云又詩曰源山多意  
氣松柏高姿凌曳杖渺雲濤天風吹泠泠二詩字跡  
道古皆失名氏

萬石峯 玉泉 雲梯百級

俱在晉江縣華表山草庵後

張方平神道碑

在南安壺公山上

按方平字安道宋城人以太子少師致仕贈司空  
諡文定嘗薦蘇軾爲諫官

一眺石 與木石居

在泉州九日山石佛巖前石廣丈餘登其上長江巖  
嶂宛然在目左鐫一眺石三字右鐫與木石居四字  
華山石刻

距南安西南三里上有石刻鄭孩如先生讀易處八  
字

六一泉

在南安縣葵山

張岳小山石刻

在惠安五公山北麓小山下

金石峯 周將軍印

在惠安縣二十都上有石刻此

五公山

惠安縣靈鷲山南石刻五公山三字相傳梁時有五  
公隱此曰唐公志公寶公化公陰公今巖上尙存符  
五道唐禮部尙書江盈家此

天湖敬生

在惠安天湖嶺前有方塔刻此四字

金剛井

在惠安官路旁井壁勒金剛經一部

淨亭石刻

在金門城南磐石之上明都督俞大猷平倭後極目  
東南一望無際爲備海要地石鐫金門外谷神完賊  
舟泊誰有生還十三字不知爲何人所題年月姓氏  
無攷

醉仙巖石刻

在同安醉仙巖有巨石刻天界及傅巖四大字

穿天石

在同安虎溪巖石上

萬壽無疆

在同安萬壽巖



鼓浪洞天

在同安鼓浪嶼

萬歲山

在同安萬歲山

仙苑

在安溪考亭書院石碣高四尺許字大如斗初漁人

得之於薛坂渡潭中康熙間輦置今所莊成安溪縣志今碑上有

晦翁書三字  
係後人添刻

魁斗山石刻

在安溪縣山形如魁斗三面臨溪下有橋舊傳雷剖

石題曰積善之家必有餘慶

海日江春

在龍溪岐山

振衣所

在龍溪鶴鳴山

梅塢

在漳浦保窰山古有大王山人者不知何代人隱居  
於此名字無攷石壁上鐫字尙存

吳田山墓銅牌

名勝志泉州郡志云昔有沈部公者名彬嘗自指葬

穴以示家人後開壙見有漆燈以石爲臺中有銅牌  
篆文云佳城今已開雖開不葬埋漆燈猶未滅留待  
沈彬來然潤州吉州亦俱載之案十國春秋彬伐樹  
掘地得一石槲蓋上有篆文開成二年壽槲馬令南  
唐書鄭文寶南唐近事皆云八字開成二年壽槲一  
所與此略異江南野史與府志同

第一山 礮溪釣磯

在漳浦鹿溪巖

眼中杯渡

在漳浦龍湫巖

清泉巖心經

在漳浦巖下大石

蓬萊深處

在漳浦清泉巖

行在

在漳浦壽山寺宋少帝駐蹕處

黏雲

在漳浦六都梅安

太武山石刻

在漳浦太武山鎮海衛大石刻象徑雲根洞大字

龍門

在海澄五通嶺

天柱巖

在長泰縣東天柱山上有屏風石高九丈濶五丈巖  
天柱巖三字如苔蘚紋各濶三尺

名勝志宋崇甯時

官七代

在長泰良岡山下石錦里

自渡渡人

在平和獅子巖溪橋

楊芳

在詔安楊芳山

海濶天空

在詔安青峙山

平寇石刻

南平平寇石唐末李先鋒平寇於此郡人刻石頌之

莊濠石

在順昌縣南龍湖郡水嶺石上有莊濠二字

嵒峽巖字

在南平嵒峽溪尾橋巖上刻蒙泉懷古四大字蔡朝

臺書未詳何代

節書閣碑

在南平校士館前

龍頭巖

在順昌屏風山石罅刻龍頭巖三字

馬官石刻

在順昌石溪都興國寺石上摩耶官二字不知所始

仙字石

輿地碑目在劍浦縣東蕭坑之前或指爲仙書在順昌秋江淨亭字形隱隱如篆世謂仙書

浮玉石

在順昌與仙字石對有浮玉二字秋水淨乃見

建安古冢石銘

稽神錄云博本建安津吏岸崩出一古塚有石銘云  
欲陷不陷被藤縛欲落不落被沙閣五百年後遇熊  
博博使平光寺僧葬之博後至建州刺史爲王潮所  
害

將樂詩刻

紹定二年

在將樂縣尉署草書飛舞相傳仙人書蔣暉有跋

譙罷高歌海上山玉瓢承露浴金丹夜涼鶴透秋雲



碧萬里西風一劍寒無上宮主訪蔣暉

分水嶺銘

輿地碑目在崇安縣鑄於岩石山

壺山石刻

在甌甯石壁削立上鐫壺天寒冰玉屏六大字筆力

道古

題識石

在武夷九曲溪頭刻郭璞識後隕於水

識云黃岡降勢走飛龍鬱鬱蒼蒼氣象雄兩水護田  
歸洞府諸峯羅列擁神宮林中猛虎橫安跡天外猿

倪對面崇玉佩霞衣千百眾萬年仙境似崆峒明楊  
恆叔云晉時未有此體必後人所作

按閩自晉太康間始築城獻圖指畫形勝留傳識

語梁文靖濟熙三山志三十九載郭璞遷州記桑

田爲海人事更改

洪水浸田人事多變

六旬甲子當有其害

六六之數當見其害

更重着衣周迴重載

見三重磨復而修之

鄭國歸

朝重關爲待

東南有水潮入其音

鳥出木空千載不昧

無朱雀山

千年無咎

前有雙眉重施粉黛

九仙鳥石山爲之眉方山爲之黛蓋太陰官也

溪澗水來盡歸於海

南臺有江出其地戶去也

主揖其客客住

主在

遊花山高

穩首束日高山鎮寨

印山見高蓋爲門鼓

山爲威

本自添金因成右兌

在乾爲金佛

但見蛇

形不知坐亥

本行已街

事過方知知而未會

久後

見了

龍山高山光照其代

建水爲陽福之水光顯朝廷

巧婦能

裁得令人愛

遷出於巧婦之裁人俱愛之

若解修心得其終倍

云民得慈心得長壽

市籠放火聚集磊磊

去郊爲市橫山

有赤路三二

有一老翁手把竹筒

乾爲主陽之位

爲主艮震爲

重添新宰在言不在

云在是乾爲主

蒼筤竹也

巫山

銘曰太康之載遷插甌基四色罕城層巒三徑洪許

南流瑞龍地應其主螺女現對花峯千載不雜世代

興隆諸邦萬古繁盛仁風其城形狀如鸞似鳳勢盛  
盤挈遇兵不懼遇荒不掠逢災不染其甲子滿廢而  
復興以上讖語靈驗疑爲後人僞託也

又郭璞記更有南臺江沙合卽有宰輔相等五言讖  
語恐亦未足信耳

### 冥聲古廟碑

名勝志在建安縣有冥聲廟吳永安二年空中忽有  
人聲遂立廟以祈歲稔有古碑

### 架壑船

在崇安武夷小藏峯

洞天

甌甯三峯山中峯鑄洞天二字

華藏巖

在浦城棠嶺華藏山頂

泗洲

在浦城盆亭嶺畔

昂山石篆

在光澤縣昂秀拔上有石壇丹鼎丹窰石上有篆文奇古不可辯沂州之水出焉

黃楊巖古碑

在歸化縣東八十里多產黃楊木故名巖有三洞其一在瀉化寺內有古石碑字畫不可辨不知何時所立

銅鼓山刻

在上杭縣銅鼓山有倒書千年二字

李斯壽字

在汀州府城東二里蒼玉洞洞產奇石郡人多觴咏於此一石膚理光整鐫李斯壽字與今篆文頗異

洪山石篆

在福甯府怡洪山上晉葛洪煉丹處山有石洞篆文

字六人莫能識宋韓伯修有六字籀文天篆刻數間  
洞屋石幘幪句

任公巖石刻

在福甯縣治舊有任公棲隱於此巖刻任公鳳棲巖  
谷清幽八字又有卧石二字沉淵字大盈尺皆任公  
手書

文殊院石刻

福甯文殊院秦溪里人得土中石刻三字傳爲文殊  
嶺上有神鐘

慧山泉迎仙臺

在霞浦慧日山

芙蓉臺

在霞浦龍首山麓石壁

近天尺五

在霞浦聖水庵石上

華峯玉井

在霞浦深澳嶺東巖

方井石刻

在霞浦縣洪武中知縣尹昌隆重浚得刻石云若

重開須是龍來



天琢元巖

在福鼎舍利塔邊

洗心臺

在福安長溪盤石上閩書宋林氏兄弟爭田鄉人勸  
諭感悟置酒石上洽款如初鐫石以志悔

登龍

在甯德縣明弘治十年水漲金溪山墩崩去半中有  
兩石相合摧流其一更一尙存中刻二字曰登龍字  
徑方五寸

放生

在甯德花洲龍潭水深崖峻崖上鑿放生二字相傳  
洲上有桃花因水漲洲成潭

一夫關

在永春州馬跳風山

文曲華世

在同安魁星山

陳宗顯去思碑

在永春陳巖寨石厓壁右

青龍潭

在大田青龍潭中隱然有此三字世傳龍乘仙人所

書非人跡能到

乾坤清氣

在漳平感化里長塔東石壁

鳳翔千仞

在甯洋穿雲洞石壁

福州諸帖

附

陸深儼山外集

鼎帖

石硬而刻手不精雖博而乏古意

星鳳樓帖

曹士冕橫刻工緻有餘清而不穠太清之亞也

玉麟堂帖

吳琚橫刻穠而不清多雜米家筆仗

王趙帖

陳鑑集名碑藪王趙帖王羲之趙子昂書木版刻在

福州

蔡端明詩刻

立牘記蔡端明書在宋代爲第一萬安渡直欲迫摩崖此數詩結體員勁典型俱在駸駸入顏光祿之室矣嘉靖甲寅六月三日雨中借姚氏本觀蒼潤軒因題

福清帖

孫承澤開者軒帖攷

福州刻絳閣急就章雁塔題名四帖碑家往往駕名  
官帖以惑人

閩中金石志卷十四終